

Акафист Пресвятой Богородице ради чудотворной Ея иконы "Всецарица" ("Пантанасса")

Кондак 1

Новоявленной Твоей иконе предстояще вернии умильно, воспеваем Ти, Всецарице, раби Твои; низпосл и цельбы к Тебе притекающим ныне рабом Твоим, да вси радостно зовем Ти:

Радуйся, Всецарице, недуги наша благодатию исцеляющая.

Икос 1

Ангел предстатель с небесе сшед, рече Всецарице:

Радуйся, И боговещанным гласом воплощаема Тя зря, Господи, возопи к Ней таковая:

Радуйся, Главизно нашего спасения;

Радуйся, Исполнение Зиждителя смотра.

Радуйся, яко Тобою Бог воплотися; радуйся, яко Невидимый в Тебе изобразися.

Радуйся, Милость мира внутрь приявшая;

Радуйся, одеяние плоти Слову соткавшая.

Радуйся, уму непостижная Горняя Славо;

Радуйся, сердца оживившая Небесная Манно.

Радуйся, Звездо, благодати сияние;

Радуйся, Источнице, живых воды излиание. Радуйся, Богородице, в женах благословенная;

Радуйся, рождающая Спаса, Дево нетленная.

Радуйся, Всецарице, недуги наша благодатию исцеляющая.

Кондак 2

Безначальное Слово Отроча младо Тобою бысть, исцеления подая Тя, Дево, чтущим и неизреченное Его Рождество воспевающим: Аллилуиа.

Икос 2

Разум недоразумеваемый разумети Дева ищущи, возопи к служащему, яко Отроковица чистая, како буду Вышняго Мати, изъясни; к Нейже Гавриил рече со страхом, зовый таковая:

Радуйся, Совета Вышняго Избраннице;

радуйся, гласа молящихся Скоропослушнице.

Радуйся, Сокровище Христова мира;

радуйся, людей Твоих Надеждою и Сило. Радуйся, раковыя язвы дивная Губительнице;
радуйся, прочих болезней Исцелительнице.
Радуйся, единое миру Заступление;
радуйся, верное в скорбех Избавление.
Радуйся, плач и слезы присно утешающая; радуйся, спасения входы всем отверзающая.
Радуйся, Скиптре и Державо Афон населяющих;
Радуйся, Жезле монахов и мирян. Радуйся, Всецарице, недуги наша благодатию исцеляющая.

Кондак 3

Сила Вышняго осенивши Тя, Отроковице, плоть прият неизреченно, показа Тя Село сладкое, хотящим жати спасение и поющим: Аллилуиа.

Икос 3

Прославися дивно святая икона Твоя, Всецарица именуемая, егда цельбоносно явися Богоматере изображение; вопиющим же пред нею с верою исцеления подаеши, да умножаются песни сицевыя:

Радуйся, Мати незаходимаго Света;
радуйся, претерпевших до конца Победо.
Радуйся, в болезнях и скорбех сущим Врачевание;
Радуйся, сирот и вдовиц нерушимая Стено.
Радуйся, двери райския отверзающая;
Радуйся, труждающихся и обремененных заступающая.
Радуйся, о спасении верных Ходатаице;
Радуйся, за род человеческий Молитвеннице. Радуйся, Лестнице небесная, возводящая от земли к небеси;
Радуйся, Водоживая, омывающая смертныя грехи.
Радуйся, Агнице, сердца незлобивых хранящая;
Радуйся, Покрове, чад Церкви осеняющий.
Радуйся, Всецарице, недуги наша благодатию исцеляющая.

Кондак 4

Живот миру даруя, Владыка мира вселися во утробу Твою неискусомужно; Матерь верных Тя показав, в мире тех воспевати призва: Аллилуиа.

Икос 4

Преславная содеяшася о Тебе, Граде Божий, исцелением бывающим от святых иконы Твоя; цельбоносная струи врачеваний приемлюще, благодарственно, о Всецарице, вопием:

Радуйся, Снадобие, боль утворяющее;

Радуйся, Прохладу, жар недужных остужающая.

Радуйся, прижигающая раковые язвы, аки пламенем;

Радуйся, поднимающая со одра оставленных врачами.

Радуйся, лик Свой пречистый избранным являющая;

Радуйся, от греховных уз разрешающая.

Радуйся, яко Тобою избавление от смерти даровася;

Радуйся, яко Тобою безсчётный сонм верных оправдася.

Радуйся, Высоту, человеческими помысли неизследованная;

Радуйся, Глубину, единым Словом изведанная. Радуйся, Пророчество прежде Тебе бывших патриархов;

Радуйся, Наставнице Тебе молившихся иерархов.

Радуйся, Всецарице, недуги наша благодатию исцеляющая .

Кондак 5

Пречистый Храм Спасов познахом Тя, Отроковице; к Тебе припадаем, Чистая, да нас соделаеши храмы Божества, вопиющих Ему: Аллилуиа.

Икос 5

Видеша чини ангельстии на руку Твоею Создавшего рукою человеки и яко Владычицу разумевающе Тя едину, аще и Рабу Себе нарекла еси, потщася песньми послужити Ти, Благословенней, сицевыми:

Радуйся, Богом поставленная превыше Небесных Сил;

радуйся, чудесными исцеленьми исполняющая мир.

Радуйся, хвалу славу от небес слышащая;

радуйся, благодарение от земли приемлющая.

Радуйся, яко семя тли в сердцах потребила еси;

радуйся, яко козней диавольских ярем сокрушила еси.

Радуйся, юдоль плачевную исполнившая радостью;

радуйся, скорби изменяющая в небесную сладость.

Радуйся, Благоухание Богу приятное;

радуйся, кающихся грешников Веселие изрядное.

Радуйся, Броне правды от искушений;

радуйся, Щите ограждения от вражды и нестроений.

Радуйся, Всецарице, недуги наша благодатию исцеляющая.

Кондак 6

Пропов едницы богоглаголивии, Спасовы ученицы, предсташа Ти, Дево, чудно, внегда от земли к небеси восходила еси, да единым сердцем и усты воспоют Богови: Аллилуиа.

Икос 6

Возсия дивная благодать от иконы Твоея, Всецарице, егда юноша, ученьми сатанинскими омраченный, пред нею паде и недвижим бысть; паче чаяния же от уз мрачных свободенный, со страхом и радостью взываше Ти сице:

Радуйся, Исправление нечестиваго жития;

Радуйся, Утешение страждущих люте.

Радуйся, бесовских полчищ от Церкви Отгнание;

Радуйся, мглы греховныя Разсеяние. Радуйся, козней невидимых Упразднение;

Радуйся, демонских чар всемогущее Одоление.

Радуйся, Светильниче, прельщенных наставляя;

Радуйся, Облаче, невинных от зла покрывая.

Радуйся, Холме, небесною манною питающий;

Радуйся, Долино, смирением Христовым насыщающая.

Радуйся, Каменю Небеснаго Царствия;

Радуйся, Зерцало преевечнаго Света.

Радуйся, Всецарице, недуги наша благодатию исцеляющая.

Кондак 7

Хотящу Тебе датися в снєдь верным, благоволил еси от Девы воплотитися, да приемлюще Пречистое Тело и Кровь Твою, познают Тя, Бога совершенного; темже дивя щєся неизреченней премудрости сей, зовем: Аллилуиа.

Икос 7

Новое показа таинство явлься Зиждитель, со ученики свершивый Тайную Свою Вечерю; мы же моляще Всецарицу удостои ти нас Божественныя Святыни, восписуем Ей сицевая:

Радуйся, Подательнице Небеснаго Хлеба;

Радуйся, Родительнице Вечнаго Живота.

Радуйся, Чаше, Христу приобщающая;

Радуйся, душу и тело с Богом сочетающая.

Радуйся, Лжице золата, исполнь Божественных Таин;

Радуйся, драгий Кивоте, вместилище великия Святыни.

Радуйся, Персте, на святую Евхаристию указуай;

Радуйся, Трапезо, предлагающая нам Пищу Святую.

Радуйся, достойных причастников одесную поставляющая;

Радуйся, ревнителей Божественныя Литургии от ада избавляющая.

Радуйся, приводящая смертных к Источнику безсмертия;

Радуйся, ограждающая чад Своих миром и крепостию.

Радуйся, Всецарице, недуги наша благодатию исцеляющая.

Кондак 8

Странное Рождество видевше, житейское всякое отложше попечение, горе имеим сердца; на сие бо Вышний явился, во еже привлещи Тому вопиущия: Аллилуиа.

Икос 8

Неотступно в недрех Отческих пребывая, Слово неописанное не земли плоть бысть; Бог Велий сотвори велиие Деве и призре на смирение Рабы Своея, слышашия сицевая:

Радуйся, невместимаго Бога вместившая;

Радуйся, надмирнаго Творца миру явившая.

Радуйся, яко сокрушися смерти держава;

Радуйся, яко исцелися Адамова рана.

Радуйся, Пластырю, струпы душевныя заживляяй;
Радуйся, Елее, язвы телесныя умащаяй.
Радуйся, Утоление болезней раждающих;
Радуйся, Облегчение мук умирающих.
Радуйся, нанеся поражение аду; Радуйся, притупившая смерти жало.
Радуйся, Чаяние всеобщаго воскресения;
Радуйся, православных несомненное Спасение.
Радуйся, Всецарице, недуги наша благодатию исцеляющая.

Кондак 9

Всякое естество ангельское и человеческое удивися величию непостижимаго Твоего воплощения,
Слове; недоумевающе же о сей велией тайне благочестия, со страхом и трепетом
благодарственно зовем Ти: Аллилуиа.

Икос 9

Многоразличными недуги одержимии, о Всецарице, от святых иконы Твоя паче чаяния
исцеления получают, да приимше верою благодать, велегласно зывают Ти:

Радуйся, здравых чад присное Сохранение;
Радуйся, болящих ко здравию Преложение.
Радуйся, детей недугующих Исцеление;
Радуйся, юных страдальцев Мати.
Радуйся, Востание на одр болезни поверженных;
Радуйся, Отрадо страхом смертным одержимых.
Радуйся, яко внемлеши человеков рыданиям;
Радуйся, призревающи на наша стенания.
Радуйся, болей земных небесною радостью Растворение;
Радуйся, люте обуреваемых паче естественное Терпение.
Радуйся, яко уготовляеши плачущим радость;
Радуйся, яко снабдеваеши кротких кривоколенных молитвы.
Радуйся, Всецарице, недуги наша благодатию исцеляющая.

Кондак 10

Спаст и хотя Зиждитель истлевшее грехом человеческое естество, сниде на Тя, яко дождь на руно, и купину Тя соделав неопалимую, Бог сый, бысть человек, да воспеваем Ему: Аллилуиа.

Икос 10

Стена еси девая, Отроковице чистая, и всем о чистоте радящим; в Тя бо вселися Бог, очищая разумныя создания Своя, да избывше всякия скверны, предлагаем Ти сицевая:

Радуйся, молчания взыскующих Собеседнице;

Радуйся, Венче хранящих девство.

Радуйся, Начало и Конец духовного совершения;

Радуйся, Хранилище Божественного откровения.

Радуйся, Троического Совета Таиннице;

Радуйся, спасения человеков Виновнице.

Радуйся, Вершино, гордым умам неприступная;

Радуйся, Убежище, смиренным сердцам доступное.

Радуйся, Чистая, Небесе Чистейшая;

Радуйся, Херувимов и Серафимов Честнейшая.

Радуйся, Обрадованная, яко прияла еси от Архангела радование;

Радуйся, Утешенная, яко руце Твои осязасте воскресшаго Христа.

Радуйся, Всецарице, недуги наша благодатию исцеляющая.

Кондак 11

Пение тщасяся разумное Спасу приносить, всегда неключими, Владычице, остаемся раби Твои; кто бо может достойно воспети Бога, Егоже имя яко миро излиянное; сего ради вопием Ему: Аллилуиа.

Икос 11

Свет велий возсияв во тьме сидящим, посети нас, о Дево, Восток свыше, Сын и Бог Твой; Тя соделав свещу на свещнице, светоносным чадом церковным наказует приносить Ти сицевая:

Радуйся, Заре умного Солнца;

Радуйся, Вместилище Божественного Огня.

Радуйся, Свете, яко одеяние святых соткала еси;

Радуйся, Свеще, яко тьму бесовскую отгнала еси.
Радуйся, косных умов Просвещение;
Радуйся, грешных сердец Озарение.
Радуйся, Деснице, из моря суетствий изводящая;
Радуйся, Луче, путеводяй к Царствию спасающихся.
Радуйся, Молние, нераскаянных поражающая;
Радуйся, Громе, губителей устрашающий.
Радуйся, лукавыя совести Просветление;
Радуйся, Умилоствление Божия Суда.
Радуйся, Всецарице, недуги наша благодатию исцеляющая.

Кондак 12

Благодать дати восхотев, Завета Ветхаго Податель Завет Новый нам дарова; мы же благодать приимше, не дела закона, но единою верою спасение уллучивше, восписуем вси: Аллилуиа.

Икос 12

Поюще Твое рождество, якоже древле Израиль в кимвалех сеновную скинию воспеваше, тако мы ныне Тя, Скинию истинну, добродетельми прославляем, да слышиши от всех сицевая:

Радуйся, Песне, воспеваемая горе;
Радуйся, Псалме, слышимый низу.
Радуйся, Единому Богу достойно послужившая;
Радуйся, Божественней Троице смирением угодившая.
Радуйся, веки Носящего носившая в Себе;
Радуйся, Престоле Содержащаго вселенную в руке.
Радуйся, Тайно неизреченная веков и времен;
Радуйся, Упование твердое народов и племен.
Радуйся, сердечное Радование иеерев благоговейных;
Радуйся, быстрое Слышание молитв церковных и келейных. Радуйся, Премудрости Доме богозданный;
Радуйся, Милости Сосуде, Богом избранный.
Радуйся, Всецарице, недуги наша благодатию исцеляющая.

Кондак 13

О Всецарице Мати, рождающая всех святых Святейшее Слово, нынешнее наше приявши пеннопение, от всякия смертныя болезни исцели ны и будущего избави осуждения вопиющих: Аллилуиа.

Тропарь, глас 4

Образом радостотворным честная Всецарицы, желанием теплым взыскающих благодати Твоя спаси, Владычице, избави от обстояний к Тебе прибегающих; от всякия напасти огради стадо Твое, к заступлению Твоему взывающее присно.

Молитва ко Пресвятей Богородице

О Всеблагая, досточудная Богородице, Пантанасса, Всецарице! Несмы достоин да внидеши под кров мой! Но яко милостива го Бога любоблагоутробная Мати, рцы слово, да исцелится душа моя и укрепится немощствующее тело мое. Имаши бо державу непобедимую и не изнеможет у Тебя всяк глагол, о Всецарице! Ты за мя упроси, Ты за мя умоли. Да прославляю преславное имя Твое всегда, ныне и присно и в безконечныя веки. Аминь.

Молитва вторая

О Пречистая Богомати, Всецарице! Услыши многоболезненное воздыхание наше пред чудотворною иконою Твоею, из удела Афонскаго в Россию пренесенною, призри на чад Твоих, неисцельными недуги страждущих, ко святому образу Твоему с верою припадающих! Якоже птица крилома покрывает птенцы своя, тако и Ты ныне, присно жива сущи, покрой нас многоцелебным Твоим омофором. Тамо, идеже надежда исчезает, несумненно ю Надеждою буди. Тамо, идеже лютыя скорби превозмогают, Терпением и Ослабою явися. Тамо, идеже мрак отчаяния в души вселися, да возсияет неизреченный свет Божества! Малодушныя утеши, немощныя укрепи, ожесточенным сердцам умягчение и просвещение даруй. Исцели болящая люди Твоя, о Всеимости вая Царице! Ум и руки врачующих нас благослови, да послужат орудием Всемощнаго Врача, Христа Спаса нашего. Яко живей Ти, сущей с нами, молимся пред иконою Твоею, о Владычице! Простри руце Твои, исполненныя исцеления и врачбы, Радосте скорбящих, в печалех Утешение, да чудотворную помощь скоро получив, прославляем Живоначальную и Нераздельную Троицу, Отца, и Сына и Святаго Духа во веки веков. Аминь.